

四庫全書

子部

欽定四庫全書

子部

薛氏醫案卷七十五
六

詳校官太醫院吏目臣宋桂

編修臣倉聖脈覆勘

總校官原任中允臣王燕緒

校對官庶吉士臣吳裕德

謄錄舉人臣龔秉震

欽定四庫全書

薛氏醫案卷七十五

明薛己訂

外科精要中

癰疽分表裡證論第二十三

伍氏曰癰疽皆因喜怒不測飲食不節陰陽不調臟腑不和腠理不密寒氣客於經絡或榮血受寒則滯而不行衛氣從之與寒相搏壅遏不通或陽氣蘊積則生寒

熱寒熱不散皆致前症又曰五臟六腑俞穴皆在背凡患瘡症易傷臟膜多致不救腑氣浮行於表故癰腫浮高為易治臟血沉寒主裡故疽腫內陷為難治又曰癰者節也癰者壅也疽者沮也一寸至二寸為癰三寸至五寸為癰五寸至一尺為疽一尺至二尺為竟體疽若脉洪數者難治脉微濡者易治初覺宜清熱拔毒已潰則排膿止痛膿盡則長肌敷痂當酌量輕重形証順逆而審治之

愚按前症若飲食少思用六君子湯以補脾胃如不應加薑桂以溫補之使邪氣自退其不起者由邪氣盛正氣虛不能發也於旬日之外見之若已發出用托裏消毒散以壯元氣助令潰腐不應須溫補脾胃其不起者由真氣虛不能潰也於二旬之外見之若已腐潰用托裏散以補氣血生肌肉不應當專補脾胃又不應須溫補脾胃其不起者乃脾氣虛不能收斂也於一月之外而見之凡此治法竊嘗用驗詳具

首論

察疽發有內外之別第二十四

李氏云疽初發一粒如麻豆發熱腫高熱痛色赤此為外發勢雖熾盛治得其法可保其生若初時不發熱體倦怠患處如故數日不腫痛內臟已壞雖有盧扁之藥亦末如之何矣

愚按前症有因元氣虛而不能發出者有因敷貼寒藥而不能發出者有因攻伐過傷氣血而不能發出

者凡有因熱毒內蘊而失疏托者審而治之多有生者

附治驗

進士申天益臂患癱寒熱頭痛形氣虛弱此手足陽明經風邪之症用桔梗升麻湯二劑外邪頓散用托裏消毒散二劑腫痛頓退乃用補中益氣湯調理形氣漸復而愈

秋官錢可容腹患癰焮腫作痛煩渴飲冷大便不通

脉沉數實此熱毒蘊於內用清熱消毒散加大黃二錢一劑諸症悉退但形氣頓虛用托裏消毒散去金銀花白芷倍加參芪歸朮而安

一男子股內患毒欲求內消其脉滑數膿已成矣因氣血虛而不潰遂針之膿出作痛以八珍湯治之漸可但膿水清稀更以十全大補湯加炮附子五分數劑漸愈乃去附子又三十餘劑而愈

一童子腋下患癰久不斂膿清脉大怠倦懶食自汗

口乾用內補黃芪湯及豆豉餅兩月而愈凡瘡潰而膿清或瘡口不合或聚腫不潰肌寒肉冷自汗色脫者皆氣血虛極也非大溫補不可

一男子肩患毒焮痛飲冷煩躁便秘脉數而實以清涼飲二劑少愈以金銀花散四劑悉退又以十宣散去桂加天花粉金銀花數劑瘡潰而痊此脉與症皆屬有餘也

一男子背瘡潰而瘀血不散此陽氣虛弱也用參芪

歸朮峻補更以桑枝灸又用托裡散加肉桂瘡口自斂此補接陽氣之法也

上舍毛體仁素陰虛春初咳嗽胸中隱痛腎脉洪數肺脉數而時不見余曰內當結癰先用六味地黄丸料一劑服之翌早來謂余曰昨得良劑嗽愈六七務求一方到監調理余曰此陰火上炎患癰之症第因元氣虛弱未能發出因其易忽余辭不能乃別用降火化痰等劑愈甚月餘復請診之脉洪滑而數余曰

膿已成矣當請常治者同議針之且免內潰之患仍
不決又月餘請視他醫已先開瘡孔偏上兜膿不出
仍內潰脉愈洪大余曰脉洪滑而數視其舌青黯內
臟已壞無能為矣後果然

辨癰疽陰陽淺深緩急治法第二十五

曾氏云凡癰疽其脉浮數洪緊腫焮作痛身熱煩渴飲
食如常此六腑不和毒發於外而為癰其勢雖急投以
涼劑多保全生其脉沉細伏緊初發甚微或無瘡頭身

不熱而內躁體重煩疼情緒不樂胸膈痞悶飲食無味
此五臟不和毒畜於內而為疽急投五香連翹湯甚者
轉毒散神仙截法黃礬丸國老膏防托毒氣免致變症
內攻尤宜當頭隔蒜灸若塗毒藥迷其腠理投諸涼藥
虛其真氣故其善惡之症在乎醫之工拙耳或氣噫痞
塞咳逆身冷自汗目瞪耳聾恍惚驚悸語言顛倒背惡
症也五善見三則瘥七惡見四則危五善併至則善無
以加七惡併臻則惡之劇矣

愚按前症善者乃五臟未傷病微邪淺使能慎起居
節飲食勿藥自愈惡者乃五臟虧損之症前篇雖云
不治若能補其脾胃固其根本多有可生者豈可以
其惡而遂棄之耶

附治驗

鄰人蘇子遇之內左手指患疔麻痒寒熱惡心左半
體皆麻脉數不時見余曰凡瘡不宜不痛不可大痛
煩悶者不治今作麻痒尤其惡也用奪命丹二服不

應又用解毒之劑麻痺始去乃作痛腫余曰勢雖危所喜作痛但毒氣無從而泄欲針之適值望日其家俱言尻神不從勢愈腫甚余強針之諸症頓退又用解毒之劑其瘡全愈

辛丑孟夏余至四明有屠壽卿氏當門齒忽如所擊痛不可忍脉洪大而弦余曰弦洪相搏將發瘡毒也先用清胃散加白芷銀花連翹一劑痛即止至晚鼻上發一瘡面腫黯痛用前藥加犀角一劑腫至兩額

口出穢氣脉益洪大惡寒內熱此毒熾血瘀藥力不能敵也乃數砭患處出紫血服犀角解毒之劑翌日腫痛尤甚又砭患處與唇上并刺口內赤脉各出毒血再服前藥至數劑而愈

一婦人背患流注內潰脹痛服流氣化痰之劑自汗盜汗脉大而弱此元氣虧損之症也與參芪各一兩歸朮各五錢肉桂二錢服而針之至夜半始出稀膿二碗許翌日大汗倦甚煩熱作渴揚手氣促脉洪大

而數仍用前藥加附子一錢炙甘草二錢二劑脉症
悉退又以六君加薑桂二十餘劑始離床褥後因勞
復寒熱作渴汗出時仲冬寢幃氣出如霧用十全大
補加桂附二劑而痊

中翰鄭朝用疽潰發熱吐痰飲食無味肌肉不生瘡
出鮮血余曰此脾氣虧損不能攝血歸源也法當補
脾彼不信用消毒涼血之劑加惡寒嘔吐始悟余言
用六君加炮薑半夏茯苓數劑諸症悉退又用十全

大補瘡口漸斂後因飲食稍多泄瀉成痢此脾胃虛寒下陷用補中益氣送四神丸而痢止繼以六君子湯而瘡愈

一婦人癸卯冬失物發怒缺盆內微腫甲辰春大如覆碗左肩脾亦腫肉色如故或針出鮮血三碗許腹痛如錐泄瀉不止四肢逆冷嘔吐惡寒或時發熱絕食已七日矣其脉洪大時或微細此陽氣脫陷也用六君加炮薑三錢附子二錢早服至午不應再劑加

附子五錢熟睡覺來諸症頓退六七少進稀粥再四劑諸症悉退飲食如故缺盆始痛針出清膿二碗許諸症復至此虛極也以十全大補加薑桂附各一錢三劑而安後減乾薑桂附各五分與歸脾湯兼服五十餘劑而愈

一男子背瘡漫腫微痛食少體倦余曰症屬形病俱虛法當補元氣為主彼不信乃用攻毒之劑中央肉黯五寸許惡症悉具復求治余曰此胃氣虛寒而變

症作矣當急溫補脾胃則惡症自退黯肉自生仍不信乃割死肉祛惡症遂致不起

毛礪菴側室肚患癰月餘矣色黯不腫內痛作嘔飲食不入四肢逆冷其脉或脫絕或浮大雜用定痛敗毒之劑余曰此氣血俱虛而作痛內決無膿不治之症也強用大溫補之藥二劑痛止色赤飲食少進余謂但可延日而已人皆以為有膿復強針之又用大補之劑始出清膿少許衆仍以為毒結於內用攻膿

保其必生殊不知乃速其死耳惜哉

論善惡形症第二十六

問曰五善七惡可得聞乎曰飲食如常一善也實熱而大小便瀉二善也內外病相應三善也肌肉好惡分明四善也用藥如所料五善也渴發而喘眼角向鼻大小便反滑一惡也氣綿綿而脉濡與病相反二惡也目不了了睛明內陷三惡也未潰肉黑而陷四惡也已潰青黑腐筋骨黑五惡也發痰六惡也嘔吐七惡也

愚按善惡形症治法見附錄

論生死形症第二十七

問曰病有甚而至生有微而至死病症難辨死生何從

決乎答曰發背潰透內膜者死

此言肝俞已上

未潰內陷面青

唇黑便汚者死

此言臟壞便瘀血

潰喉者不治陰患入腹者不

治入囊者不治鬚深數寸者不治在頤後一寸三分名

銳毒亦不治無此者生流注雖多療之必愈

愚按前症有因元氣虛弱而毒氣內陷者有因初作

失於內疏托裡和榮衛者有因毒盛失於消解者有
因虛弱失於補托者有因膿成失於針刺者有因腐
潰失於補養者若發背腦疽屬濕熱上壅者黃連消
毒散補中益氣湯以除濕毒補脾肺滋腎水若鬢疽
銳毒屬風熱者柴胡山梔散以清肝火養肝血若陰
虛用六味地黃丸以生腎水滋化源若患於小腹補
足三陰之血養脾胃之氣庶可保其生也其流注之
症或因飲食勞倦房室陰虛或七情內動六淫外侵

以致血虛互相凝滯或產後血瘀隨虛流注或結塊或漫腫宜用益氣養榮湯以固元氣佐以葱熨解散凝滯更以豆豉餅祛散寒邪潰久內有瘀肉用針頭散腐之多有生者設若不守禁調攝多致不起慎之

形症逆順務在先知第二十八

論曰癰疽潰後形有逆有順白睛黑小一惡也不能下食納藥而嘔食不知味二惡也傷痛渴甚三惡也體項不便四肢沉重四惡也聲嘶色脫唇鼻青黑面目浮腫

五惡也煩躁時嗽腹痛渴甚瀉利無度小便如淋六惡也膿血大泄腫痛尤甚膿色敗臭七惡也喘粗氣短恍惚嗜卧八惡也未潰黑陷面青唇黑便污九惡也氣噎痞塞咳嗽身冷自汗無時目瞪耳聾恍惚驚悸語言顛倒十惡也又腦為諸陽所會頸項近咽喉腎俞皆致命之所俱不可灼艾

愚按前症未潰黑陷面青唇黯便污者臟腑內潰之惡症也氣噎痞塞咳嗽身冷自汗者脾肺虛敗之惡

症也不食便瀉腸鳴耳聾目瞪者脾腎虛敗傳變之惡症也治法詳見附錄

審內症用藥附

自瀉嘔吐不進飲食腎脉最虛如是之疾古人皆以為不治然亦有救療之理焉耳

愚按前論發內經之微旨開萬世之聾聵其惠博矣此症實命門火衰不能生脾土而虛寒以致自瀉嘔吐或胸膈不利或食而不化或大便不實宜用八味

丸及六君子加薑附若因房勞過度真陽衰敗或原稟不足不能生脾土而飲食不進者用補中益氣加附子薑桂并東垣補真丸多有得生者若用參苓之類直補脾胃鮮有不誤若或以為毒氣內攻而治者俱致不起

附治驗

通府李廷儀患流注唾痰氣促自恃知醫用化痰理氣等劑半載而潰用托裡等劑膿水淋漓腫硬不消

寒熱往來飲食少思肌肉消瘦大便不實手足時冷
兩尺脉浮大按之微細余曰此屬命門火衰當用八
味丸不信乃服參芪歸朮之類更加痰喘泄瀉服八
味丸益氣湯年餘而痊

御醫王介之室背疽不起發不焮赤泄瀉欲嘔飲食
少思手足厥冷脉息如無此陽氣虛寒用大補之劑
加附子二錢薑桂各一錢不應附子加至三錢二劑
泄瀉愈甚又以附子一枚薑桂各三錢參芪歸朮各

五錢作一劑腹內始熱嘔吐始止手足始溫脈息始復仍用大補加薑附四劑乃潰三十劑得愈六年後仍歿虛寒之症

大尹陳國信素陰虛背患疽用參芪大補而不斂內熱發熱舌燥唇裂小便頻數口乾飲湯嘔吐瀉利耳閉目盲仰首眩暈脈浮大而數余曰瘡口不斂脾土敗也舌燥唇裂腎水枯也小便頻數肺氣衰也內熱發熱虛火上炎也口乾飲湯真寒之象也嘔吐瀉利

真火衰敗也耳閉目盲肝木枯敗也仰首眩暈腎氣絕也辭不治後果歿

一男子患癰腫硬不潰脉弱時嘔彼欲用敗毒等藥余謂腫硬不潰乃陽氣虛弱嘔吐少食乃胃氣虛寒法當溫補脾胃大抵腫赤痛甚煩躁脉實而嘔為有餘當下之腫硬不潰脉弱而嘔為不足當補之若痛傷胃氣或感寒邪穢氣而嘔者雖腫瘍猶當助胃壯氣彼不信仍服攻伐之藥而果歿

發背治貴在早論第二十九

伍氏曰夫癰發背者皮薄腫高多有椒眼數十粒疽發背者皮膚頑硬狀如牛頸之皮二症皆宜灼艾癰成膿則宜針其針當以馬銜鉄為之形如薤葉樣兩面皆利可以橫直裂開五六寸許取去毒血其病頓輕須先灸而後裂可服神仙追毒丸利去毒根次服排膿托裡等藥調治疽成膿則宜烙用銀篋大寸許長六寸燒赤頻烙患處以膿出為效大抵癰疽難於諸科非心傳契妙

其可以易治耶

愚按前症若氣血充實其膿既成宜速針之勿藥可愈若氣血虧損膿不能出或膿出反痛須托裡養胃庶保終吉詳見第四十

瘡出未辨用津潤墨園論第三十

伍氏曰但覺背兩脾間赤痒腫痛或有白粒且以津唾時潤令濕切勿抓破大抵在背微有赤腫點或因跋涉入浴犯水或因飲酒膾炙而作初未辨症且以津潤時

用墨圍之若腫赤急就圍中灼艾最善人皆疑以火熱太過多致延漫誤者衆矣

愚按疽發背胛若有瘀肉腐爛膿水淋漓腫痛仍作者此處有筋一層間隔內膿不出故也宜用針引之老弱者若待其自潰多致不救治者審之

附治驗

水部曹文兆背胛患之半月餘瘡頭如粟且多內痛如刺其脉歇止此元氣虛而疽蓄於內非灸不可遂

灼二三十餘壯飲以六君加藿香歸數劑瘡勢漸起
內痛頓去胃脉漸至但瘡色紫瘀肉不潰此陽氣虛
也燃桑枝灸患處以解散其毒補接陽氣仍以前藥
加參芪歸桂色赤膿稠瘀肉漸腐兩月而愈夫邪氣
沉伏真氣怯弱不能起發須灸而兼大補若投以常
藥待其自潰鮮有不誤者

上舍陳履學之內先從左肩下一點寒三日後右肩
下發一白腫如甌中紅如酒盞自用消解涼藥一劑

不散次投十宣散四劑加痛畧紅次連投參芪丁桂
防芷之劑膿潰後惡心嘔吐頭暈不止厥逆寒戰鼓
牙虛汗頂平膿清此投解散涼劑之誤急洗去圍藥
投以參芪歸朮地黃薑附大劑一服原從左肩下舊
寒一點先熱起又進一服遍腫浮熱腫高膿稠兼絳
烏金膏數日出腐筋如脂膜大小數片日進前藥二
服參芪投至八錢踰兩月始安愈後時以勞厥即投
參芪歸朮薑附大劑乃甦

看色灼艾防蔓論第三十一

伍氏曰瘡腫色赤按之色不變者此膿已成矣按之隨手赤色者其亦有膿也按之白者良久方赤此遊毒已息可就赤白盡處灸斷赤腫自消凡癰疽以手按之若牢鞣未有膿也若半軟半鞣已有膿也又按腫上不熱者為無膿熱甚者為有膿宜急破之

愚按瘡瘍毒氣已結而不發者法當補其血氣使膿速成而針之其膿既潰宜培養脾胃以生肌斂口大

凡瘡瘍膿血既潰當大補血氣為先惟有他症當以
末治

附治驗

二守施希祿項患毒膿已成因畏針焮延至胸色赤
如霞其脉滑數飲食不進月餘不寐肢體甚倦此氣
血虛而不能潰也余針之膿出即睡覺而思食用托
裡藥兩月而愈

州守胡廷器膿熟不潰倦怠發熱余為針之膿遂湧

出已而發熱惡寒大渴不止此虛之極也服人黃芪湯二劑熱愈甚又二劑始應再以當歸補血湯數劑漸痊

一老人腿患癱膿自潰忽發昏瞶脉細而微此氣血虛極也以大補之劑而甦

一弱人流注內潰出敗膿五六碗是時口眼歪斜以獨參湯加附子二錢二劑少愈更以十全大補之劑月餘而痊大抵瘡瘍膿血既泄當大補氣血為先雖

有他症當以末治之

論瘡口冷瀉難合第三十二

治癰久不合其肉白而膿少者此氣血俱虛不能潮運而瘡口冷瀉也每日用艾葉一把煎湯避風熱洗及燒松香烟薰之更以神異膏貼之必須守禁調理否則不效

愚案前症果因寒邪凝滯氣血不能榮衛宜用斯法祛散寒邪補接陽氣其功甚大若因氣血虛弱不能

潮會瘡口必用補脾胃生氣血為善丹溪先生云諸
經惟少陽厥陰之生癰疽宜預防之以其多氣少血
也血少而肌肉難長瘡久未合必成敗症苟反用驅
利毒藥以伐其陰分之血禍不旋踵矣

附治驗

地官李孟卿環跳穴患疽內服外敷皆敗毒寒劑因
痛極刺之膿瘀大泄瘡口開張其色紫黯右關脉浮
大此胃氣復傷不能禁於患處也余以豆豉餅六君

子加藿香砂仁炮薑數劑由是胃氣醒而飲食漸進
患處暖而肌肉漸生再以十全大補湯而愈

大尹都承慶患附骨疽內痛如錐外色不變勢不可
消喜其未用寒劑祇因痛傷胃氣而不思飲食用六
君子湯治之飲食少進更以十全大補三十餘劑而
膿成針去仍以大補湯倍用參芪歸朮加麥門五味
遠志貝母數服膿漸止而瘡亦愈按二症蓋因濕熱
滯於肉理真氣不能運化其始治宜實脾土和氣血

隔蒜灸而疽自消矣

治背疽糝藥方

李氏云龍遊有患背疽者大潰五臟僅隔膜耳自謂必死用鯽魚去腸實以羯羊糞烘焦為末乾糝之瘡口自收此出洪氏方屢用有效故附於此須候膿少欲生肌肉時用之

附治驗

黃汝耘患發背用生肌藥益潰大便泄瀉其脉微緩

余謂脾胃虛先用二神丸以止其瀉次用大補藥以固其本更用猪蹄湯洗患處用黃芪末以塗其外喜其初起曾用艾灸毒不內攻兩月而愈

許鴻臚發背十餘日腫硬木悶肉色不變脉沉而實此毒在內先以黃連內疏湯更以消毒托裡散其毒始發奈欲速愈急用生肌藥患處如負石身如火焮遂致不起

用藥溫涼須防秘泄論第三十三

伍氏曰凡瘡家皆宜宣去其毒蕩滌陳莖宜用神仙追
毒丸六味車螯散五香連翹湯千金漏蘆湯更當詳辨
稟賦強弱臨時加減大抵治瘡要法須臟腑堅而不秘
通而不泄則真氣不耗邪無所留如秘結神效麻仁丸
凡瘡潰後尚覺虛熱可與五香湯加大黃朴硝且如治
瘡溫藥先用桂以通血脈宣導百藥冷藥必用地黃補
不足益氣填髓近用乳香散乳香消毒菜豆清熱真良
藥也

愚按大腸秘結果因血燥胃氣不虛最宜前藥若因
精血枯涸用八珍桃仁麻仁其潰後發熱若因氣虛
用四君黃芪當歸血虛用四物白朮茯苓氣血俱虛
用八珍黃芪若大便秘小便赤用四物麥門五味如
不應急用加減八味丸或六味丸若下後元氣傷而
發熱用六君當歸胃氣虛明用補中益氣湯大
凡二便肝腎主之經云腎明液開竅於二陰若津
液滋潤大便通利若津液不足必因脾氣虧損當培

養化源

附治驗

儒者顧大有年幾六旬仲冬背疽初起入房患處黑死五寸許黯暈尺餘漫腫堅硬背如負石發熱作渴小便頻數兩耳重聽揚手露體神思昏憤脉沉而細右手為甚便秘廿七日計進飲食百餘碗腹內如常衆欲通之余曰所喜者此耳急用大劑六君加薑附肉桂三劑瘡始焮痛自後空心用前藥午後以六味

丸料加參芪歸朮五劑復用活命飲二劑針出黑血甚多瘀膿少許背即輕軟仍用前藥便亦通利余他往四日神思復昏瘡仍黑陷膿水淋漓飲食不進急以參芪歸朮各一兩炮附子五錢薑桂各三錢服之即索飲食并鴨子二枚自後日進前藥二劑肉腐膿潰而愈

錦衣傅允承母年踰七十腰生一瘤作痒異常脉浮數而反惡寒余曰此瘡疽之症也未潰而先弱何以

收斂况大便不通則真氣已竭治之無功其子懇請
不得已用六君加藿香神麩數劑飲食漸進大便始
通更用峻補之劑潰而膿清作渴再用參芪當歸麥
門五味熟地而渴止允承喜曰吾母可無虞矣余曰
尚難收斂先日之言也彼疑遂延他醫卒致不起

生白茹切護勿觸論第三十四

伍氏曰癰潰之後敗肉漸去新肉漸生日見堆阜方成
白膜新肉當滋養平復無虞大凡瘡口未可速合日用

猪蹄湯洗去惡濁外敷生肌膏神異膏毒膿出盡可用
聖效散以合瘡口更慎起居節飲食戒七情否則虛症
蜂起多致不救慎之

愚按前症敗肉去而新肉生者須先微赤四沿漸生
白膜者此胃中生氣也用四君子湯以培補之若赤
甚者血虛而有火也用四物加參芪白朮以調補之
若赤而不生膜者氣虛也用四君加當歸黃芪若色
白而無神者氣血俱虛也用十全大補加薑桂如不

應急加附子大凡瘡疽潰後敗肉漸去新肉漸生此
乃脾胃之氣充實也若惡濁已去宜用當歸膏

體察愛護論第三十五

伍氏曰癰疽一症病人當自體察凡初作先以墨圍患
處却視浮沉聚散膿出視其多少肉生視其闊狹飲食
視其美惡臟腑防其秘泄瘡口防其奢裂宜戒怒節勞
調補元氣保愛體察慎不可忽

愚按前論即丹溪先生所云癰疽當先助胃壯氣使

根本堅固東垣先生教人以飲食有節起居有時素問反覆言之可不慎哉大凡泄瀉易損元氣腫瘍犯之不能成膿潰瘍犯之不能生肌患者審之

附治驗

太守朱陽山之內年五十二四月四日當背心生疽如粟三日漸大根盤五寸許不腫痛不寒熱脉微而沉余曰實則痛虛則痒不發不治潰而不斂亦不治乃與大補陽氣之劑色白而黯瘡勢如故神疲食減

小便淋瀝乃與大補氣血加薑桂二劑瘡仍不起十
五日涉怒嘔瀉並作復與大補藥一劑瘡仍不起留
前藥二劑昏憤不服或勸之省悟依方連進七劑十
六日瘡起而潰色紅而淡十九日與大補二十餘劑
後因勞自汗口乾舌強太陽髮際腦頂俱脹此血氣
俱虛肝膽火上炎用補中益氣加山梔芍藥頓愈但
內熱少睡手足發熱不時霍熱用逍遙散加山梔熱
退復用歸脾湯瘡亦愈計瘡發及斂凡四十二日未

嘗一日用攻瘡之藥

江陰舉人陳鳴岐寓京患背疽用大補之劑而愈翌日欲回先期設席作謝對談如常是晚得家信大拂其意惱怒發熱作渴食梨子少許至夜連瀉數次早促余視脉已脫矣竟至不起夫梨者利也疏利下行之物凡脾胃虛寒產婦金瘡者皆當忌之

用香藥調治論第三十六

伍氏曰氣血聞香則行聞臭則逆大抵瘡瘍多因營氣

不從逆於肉理鬱聚為膿得香味則氣血流行故當多服五香連翹湯萬金散金粉散凡瘡本腥穢又聞臭觸則愈甚若毒入胃則咳逆古人用之可謂有理且如飲食調令香美以益脾土養其真元可保無虞矣

愚按前症說見第十八十九

飲食居處戒忌第三十七

李氏云病疽之人當戒酒麪炙燻醃臘法酒生冷油膩雞鵞魚腥之類起居七情尤當深戒臥室潔淨馨香使

氣血流暢仍忌僧道孝子產婦經婦雞犬猫畜若背疽難於隱几宜用菜豆十斗作一袋隱伏其上解毒涼心也

愚論前論慎起居薄滋味恐病者好動四體甘嗜性熱性寒之物使火益熾而胃氣益衰則所患淹滯不愈又誰咎哉不若預為之防當以古人之言為戒如菜豆性寒主丹毒煩熱風癩或金石所發實熱煩渴飲食如常症屬純陽者宜用否則不可用也

論醫者更易良方第三十八

李氏云嘗見世間醫者每有妙方秘而不傳或更改以
惑人誠可惡也余思西華麥飯石膏守死不傳其立心
私刻君子責之矣昔趙公宣教字季修來宰龍泉兼程
而進患鼻衄日出數升時家兄教以服藕汁地黃膏趙
叩諸醫云此為戒服之劑乃數易醫無效家兄陰餽前
汁服三日而疾愈兄曰此即前所獻之方趙驚嘆曰向
非醫者譎計以惑我早信此方豈久受此困耶今以屢

試屢驗不可易者如因熱毒衝心而嘔用內托散

一名萬全

散因脾胃虛弱而嘔嘉木散熱毒腫痛麥飯石膏陰虛作渴加減八味丸此四方屢為醫人眩惑使人勿用深憫患者之受苦故舉趙公之事以例之

愚竊以為方者倣也倣病因以立方非謂內經無方也若執古方以治今疾猶拆舊宇以對新宇其長短大小豈有舍匠氏之手而能合者乎設或有合以為亘古不易之方此又先王普濟之神術奚必秘而私

之耶余嘗觀太無先生治滇南一僧遠遊江浙思親成疾先生惠之以飲食藥餌復贈金一鎰以資其歸此固我醫道之當然也今之醫者或泥古或吝秘或嗜利以惑人其得罪於名教多矣

神仙追毒丸

一名聖後丹一名玉樞丹又名解毒丹又名萬病丸又名紫金錠

治症見後

文蛤

即五倍槌破洗焙末三兩

山茨菰

去皮淨末二兩

麝香

三錢另研

千金

子

一名續隨子去殼研去油取霜一兩

紅牙大戟

去蘆焙乾末一兩半

右用糯米煮濃飲為丸分為四十粒每服一粒用井
花水或薄荷湯磨服利一二次用粥止之合時用端
午七夕重陽或天德月德日須淨室焚香修置效驗
不可盡述凡人出入不可無此藥兩廣山谷間有草
曰胡蔓又曰斷腸亦有感蛇毒致生惡菌名為定年
藥有淫婦與北人交好者別時陰以藥置飲食中仍
戒之曰子必某時來若依期而至彼復以藥解之若
過期不往必死故謂之定年藥如服前藥一粒其病

即瘥昔有一女久病勞瘵為尸蟲所噬磨服一粒吐
下小蟲甚衆更服蘇合香丸遂愈如菌蕈菰子砒石
毒藥死牛馬河魀魚及時行瘟疫山嵐瘴氣喉閉喉
風自縊溺水撲死但心頭微溫未隔宿者生薑蜜水
磨灌一粒即甦癰疽惡瘡湯火蛇蟲犬獸所傷東流
水磨塗并服顛邪鬼氣鬼胎暖酒磨服無不效者愚
意此藥果能有積毒中毒毒蟲纏滯深固誠有神效
若病自內出者尤當審其虛實而用之

轉毒散治一切癰疽利去毒根以免傳變之症

車螯

紫背光厚者以鹽泥固濟煨赤淨末一兩

輕粉

五分

甘草

一分

右每服四錢括萋一枚杵細煎酒五更初調服下惡物為度未應再服功在五香連翹之上緩用五香連翹湯急用神仙截法

愚按前二方果積毒於內元氣不虛宜用仍當審之
孫真人單煮大黃湯宣熱拔毒治大便秘結熱毒蓄於
內

錦紋大黃

酒浸
去皮

右水煎服此快利要法也

愚按前方寒涼祛毒之劑仍審元氣虛實症屬內外
而用之

附治驗

僉憲申天益兄背患疽脉沉而實腫硬木悶大便秘
結此毒蓄於內用大黃白芷名萬全散一服去瘀血
瘡頓消

鄭進士患癰痔痊大便秘結服大黃等藥反廢飲食
余用補氣血之劑加桃仁麻仁未效更以猪膽汁深
納穀道續以養血氣而愈

神仙截法治癰疽發背一切惡瘡預服則毒氣不入內

真麻油

一斤銀石器內煎
熱十數沸候冷

右用酒兩碗入油五盞通口熱服一日用盡緩則數
日服之吳安世云吾家三世用之無有不驗又聞獵
者云凡中藥箭急飲麻油藥毒即消鄭學諭德甫屢

用之甚驗

愚按麻油下三焦熱毒通大小腸滯氣若瘡瘍初起
毒蓄於內大便秘結者用之以疏通其毒誠為良法
大便不實三焦虛熱恐非所宜用者審之

秘傳連翹湯

連翹

升麻

朴硝

各一兩

玄參

芍藥

白薇

防風

射干

各八分

大黃

二錢

甘草

炙五錢

杏仁

八十箇去

皮共同麵
炒黃另研

右每服四錢水煎服下惡物後服內托散之類

漏蘆湯治癰疽發背丹癰時行熱毒赤腫焮痛

漏蘆

白芨

黃芩

麻黃

去節

白薇

枳殼

麩皮炒

升麻

芍藥

粉草

炙各二兩

大黃

蒸三兩

右每服四錢水煎服以利為度若實熱而便秘倍加之

千金漏蘆湯

漏蘆

黃芩

白薇

連翹

枳殼

去穰麩炒

升麻

粉草

麻黃節

去

大黃

濕紙包煨

朴硝

各一兩

右每服五錢薑水煎去查空心服下惡物為妙

愚按三方發表攻裡行氣解毒之劑想當時因有是症而用是藥也

六味車螯散

車螯

四箇黃泥固濟火煨

燈心

三十莖

甘草節

二錢

瓜萋

一箇杵

右用酒二盞煎八分入蜜一匙車螯二錢膩粉少許

空心服下惡血為妙

愚按前方瘡瘍積毒於內大便秘結元氣充實者宜

用

止痛靈寶散

鬼繫腰

生於陰濕竹籬石岸絡石而生者其藤柔細兩葉相對形生三角用藤葉一兩洗淨

晒乾

皂角刺

一兩對新瓦上炒黃

瓜萋

大者一箇杵炒用仁

甘草節

五分

藥

明乳香

各三錢另研

右每服一兩水酒各半煎

愚按前方治腫瘍毒氣凝聚作痛之藥潰後慎之鬼

繫腰即薜蘿也又名絡石

神效麻仁丸

大麻仁

研細

大黃

煨三兩

人參

二錢

訶子

煨肉一兩

右為末入麻仁煉蜜丸桐子大每服三十九滾水下
愚按前方潤大腸結燥之藥血液枯涸者不可用雖
有人參訶子亦難倚仗

清心內固金粉散

一名金花散

辰砂

另研

白茯苓

人參

甘草

各三錢

菘豆

四兩

雄黃

錢一 朴硝

另研

荳蔻仁

各五錢

腦子

麝香

另研各一錢

右為末每服一錢半蜜湯調

愚按前方若熱熾腫痛飲食如常者乃可用之

猪蹄湯治一切潰瘍消熱毒去惡肉解穢惡甚效

白芷 甘草

羌活

露蜂房

有蜂兒者

赤芍藥

當

歸

各等分

右先將猪蹄一隻以水五碗煮取清湯入前藥三五兩煎數沸去查洗患處

洗藥神效散

蛇床子

二兩

朴硝

一兩

右每用五錢水二碗煎數沸洗淨拭乾糝後散

聖效散

黃栢

炒黑

川山甲

炒黃一兩

檳榔

木香

雞內金

二枚

右為末每用少許搽瘡口內日五七次方效

愚按前方若毒氣已盡宜用之否則反益其邪用當

歸膏為善

神秘陷脉散

黃芪

人參

川芎

當歸

酒洗

赤芍藥

粉草

地骨皮

五加皮

忍冬葉

橘紅

各一兩

乳香

沒藥

各五錢

若每服五七錢水酒各半煎連進五七服甚效

愚按前方乃托裡消毒行氣破血之劑也若曰補益之功實少焉

騎竹馬灸法圖

內托散

五香連翹湯

沉麝湯

五香湯

漏蘆湯

柞木飲

阿膠飲

牛膠飲

黃礬丸

國老膏

萬金散

遠志酒

已上方
見上卷

薛氏醫案卷七十五

欽定四庫全書

薛氏醫案卷七十六

明薛已訂

外科精要下

論癰疽用麥飯石膏治效第三十九

李氏云麥飯石膏治發背癰疽神妙惜世罕知有患者因膿不潰以毒藥罨之其勢益甚毒延咽喉脚膝皆為不治余用此膏一夕頓潰凡疽得膿其毒始解或有不

潰者須用此膏故錄之俾精擇修合以取十全之功也
愚按前症屬腑屬陽而氣血未損者用前膏敷之固
無不愈然亦有屬臟屬陰而氣血有虧者當審其因
而調治其內可也大凡瘡瘍之作由胃氣不從瘡瘍
之潰由胃氣腐化瘡瘍之斂由胃氣營養余嘗治初
結未成膿者托而散之已成欲作膿者托而腐之膿
成未潰者托而開之膿已潰者托而斂之東垣先生
云胃氣乃生發之源為人身之本丹溪先生亦謂治

倉當助胃壯氣使根本堅固厥有旨哉

詳見附錄用藥加減之法

麥飯石膏

白麥飯膏

炭火煨醋淬數次研極細二兩

鹿角

生取帶腦骨者斷之用炭火燒烟盡

研極細四兩

右用米醋調和入砂器煎以竹片不住手攪熬成膏
先以猪蹄湯洗淨以鷲翎拂塗四圍乾則以醋潤之
若腐爛用布帛攤貼之

論癰疽敷神異膏功用第四十

凡疽症先以麥飯石膏塗之俟瘡根漸收却敷神異膏
斂之夫癰疽之發有淺深故收斂之功有遲速斷不可
早用收口之藥恐毒氣未盡後必復發為患匪輕但麥
飯膏難於脩合用神異膏亦效

愚按前症若毒已解而不生肌收斂者元氣虛也用
六君子湯壯其脾胃則肌肉自生設有餘毒亦能自

解

詳見附錄
用藥關鍵

神異膏

露蜂房

蜂兒多者一兩

玄參

五錢

蛇蛻

鹽水洗一兩

黃丹

水飛砂五兩

麻油

斤一

杏仁

一兩亂髮雞子大

男子者如

右先將麻油入砂器煎髮熔盡下杏仁更煎黑入蜂

房蛇蛻仍煎黑濾去入黃丹急攪試軟硬得中即成

膏矣其丹不必拘定前數凡膏藥用日久必老硬煎

時預取嫩膏少許如硬量和之

愚按神異膏乃解毒生肌之良劑若毒既解而肌不

生當治其內不可泥為有餘之症率用攻伐以致毒

在內者不能發散在外者不能收斂其為禍不淺夫
有餘者熱毒也虛火也不足者陰虛也營氣也瘡毒
特其形耳

家藏神驗血竭膏

當歸

酒洗

白芷

大黃

生用

黃連

黃蘗

木鼈子

去殼

皂角

露蜂房

杏仁

各一兩

乳香

沒藥

血竭

各三兩

亂髮

男子者一兩

麻油

黃丹

水飛

細者炒晒

右除乳沒血竭餘入油煎焦去渣入髮熔化下丹將

柳枝不住手攪候軟硬得中入乳香等攪勻即成膏
矣

愚按血竭膏取其以毒攻毒也若瘡惡已去毒氣既
消宜用神效當歸膏以其生肌續筋也

厭熱神白膏

大黃 白朮 黃栢生用 南星 赤小苳 黑蛤粉

各一
兩

右為末用芭蕉汁調塗如乾仍以汁潤之

愚按神白膏藥味多寒而南星之性辛溫佐之有效
加草烏尤妙

牡蠣地黃膏

大黃

一兩為末

牡蠣

用鹽泥封固煨赤出大毒研細二兩

生地黃

浸水

右研生地黃汁調塗患處如乾更用汁潤之

愚按前膏苦寒鹹寒之劑症屬純陽用之殊效然此

症亦有屬純陰者亦有屬半陰半陽者

治法見附錄用藥關鍵

李氏云疽疾既成先服取毒之藥外敷麥飯石膏五七

日後病漸減合用川烏二烏丸以活血氣生肌肉排宿
膿祛風邪後服內補十宣散

川烏丸治發背活經絡

木鼈子

去殼

當歸

赤芍藥

大川烏

去皮

蘇木

獨活

羌活

各一兩

沒藥

另研

五靈脂

去砂微炒

穿山甲

蛤粉

炒各一兩

右各另為末酒糊丸桐子大每服三十丸溫酒下

二烏丸治發背托裡定痛祛風涼血

薄荷葉

羌活

各三兩

川芎

玄參

地榆

麻黃

去根節

蔓荊子

旋覆花

荊芥蕙

防風

天麻

白芷

白殭蠶

直者去絲足嘴炒用

牛蒡子

炒

甘菊花

各二

兩

大川烏

去皮共炮

何首烏

不見鐵器

粉草

炙各四兩

蟬蛻

洗去

土足半兩

右為末煉蜜丸彈子大每服一丸細嚼茶酒任下

愚按前二丸用之對症固善然病有多端而所因不

同恐不可驟施也治者審之

論癰疽口緊小硬論第四十一

李氏云大抵疽口緊小而硬者蓋因風毒所勝合用蚣
蝎散摻瘡口以神異膏貼之

蚣蝎散

赤足蜈蚣

一條去頭足

全蝎

三箇去足生用

右為末用猪蹄湯淨洗搽之

愚按前症乃風寒滯於瘡口而未傳於內也凡傷損
之症尤多此患經云風症善行數變入臟甚速死生

在乎反掌當急分表裡虛實而治之其邪在表者善伸數欠筋脉拘急惡寒惕搦脉浮而弦宜羗活防風湯和解之傳於裡者舌強口噤項背反張筋惕搐搦痰涎壅盛胸腹滿悶或便溺閉赤時或汗出脉洪數而弦宜大芎黃湯疏導之其汗初出者由風熱鬱於裡亦宜大芎黃湯之類下之若熱既退臟腑已和而汗仍出者表虛也宜白朮防風湯以實其表然解散和解疏導三法此治暴患之症氣血未損者若膿瘀

內嗽而見前症者宜針之急投十全大補或口噤遺尿乃氣血虛極亦用十全大補加炮附子大抵此症若因膿血去多宜以補中益氣加羌活主之或人素多痰因傷損而見風症宜二陳白朮芎歸梔子苓連氣虛加四君血虛加四物血氣俱虛內熱甚而生風者宜四物參朮柴苓梔子若因怒傷而見前症宜小柴胡湯倍加川芎山梔天麻釣藤鈎若患破傷風至三五年忽然復發或跌撲而患者皆氣虛有痰所致

也用二陳參朮芎歸主之

治驗見
正體部

論癰疽喉舌生瘡如菌第四十二

李氏云癰疽不服內托散或失宣內毒致咽喉口舌生瘡甚則生紅黑菌害人甚速當用琥珀犀角膏治之向有患此症者諸法不效余用此藥一日而安

愚按前症多因酒色過度虧損腎水虛火上炎或五疔元氣消燄虛火上攻而致治當滋其化源最忌黃栢知母之類恐復傷胃氣也

附治驗

大尹王汝鄰兩足發熱吐痰如湧左尺數而無力余
謂足三陰虛彼反服四物二陳黃栢知母之類喉舌
作痛又服清熱敗毒之劑其舌如赤桃脉洪數而無
力此脾肺復傷腎經虧甚虛火上炎水泛而為痰也
當滋化源以生腎水遂用補中益氣湯六味地黃丸
而愈

二守韓宗器不慎起居舌脹如菌痰湧便秘服苓連

二陳之類脉浮而數欲針出血余謂此足三陰虧損之症且有形而不痛者陽之類也法當峻補其陰母損其血况虛浮之脉乎遂朝補脾肺夕滋腎肝而愈後因大勞面目俱赤遍身搔痒時已仲冬余曰大熱而甚寒之不寒是無水也乃用制火壯水之劑而愈

搖城金允文舌脹吐痰反服降火化痰針刺出血便秘痰甚余診之左尺關洪數右寸關弦數用滋腎水生肝血益脾胃之劑諸症少愈因近火頓面赤身痒

六脉弦數余謂此水竭火升之象難免于春二月矣
於次年清明日果卒

琥珀犀角膏

真琥珀

研

犀角

鎊各一錢

辰砂

研極細

茯神

去皮心各二錢

片腦

研一字人參

三錢酸棗仁

去皮炒二錢

右為末煉蜜丸彈子大每服一九麥門冬煎湯化下
愚按前方雖有人參茯神酸棗仁安神補氣但琥珀
等四品氣味辛散恐虧損真氣須審症而用之可也

李氏云癰疽之症不服托裏之藥熱毒內攻喉舌生瘡
甚至黑爛當服犀角散以解其毒

犀角屑 玄參 升麻 黃芪 赤芍藥 麥門

冬去心生粉草

當歸

各一兩

大黃

微炒三兩

右為粗末每服三錢水煎

愚按前方破血降火內疏之劑也若其脉沉實大便
秘結發熱作渴喜飲冷者屬熱蓄於內方可用之若
其脉虛浮大便不結發熱作渴畏飲冷者乃屬血虛

於外可用當歸補血湯若尺脉洪數而無力發熱作渴小便頻數者屬腎水不足虛火上炎宜用加減八味丸蓋此症多因腎水虧損虛火上炎故也

論癰疽膿成用替針丸第四十三

曾氏曰癰疽膿熟塗以替針丸瘡口自開古人云癰疽能殺人若針藥得其宜則生失其宜則死可不慎哉

愚按瘡瘍之症若毒氣已結腫赤熾盛中央肉死黯黑者內用托裏健脾之劑外用烏金膏塗之則黯處

漸低赤處漸起至六七日間赤黯之界自有裂紋如
刀劃狀其黯漸潰若用鈹針利剪徐去猶好須使不
知疼痛不見鮮血為善若膿未流利宜用針於紋中
引之若膿水已出腫痛仍作乃內筋間隔亦用針引
之若元氣虛弱誤服尅伐之劑患處不痛或肉死不
潰者急溫補脾胃亦有復生矣後須純補脾胃庶能
收斂若妄用針刀去肉出血使陽隨陰散是速其危
也若膿潰而煩痛未痊脉洪滑粗散者真氣虛而邪

氣實也為難治脉微瀋遲緩者邪氣虛而真氣將復也為易治

論癰疽割傷第四十四

李氏云癰疽有悞搽毒藥或針刀開割瘡口不合不可用澁斂之藥宜用猪蹄湯北艾湯間洗傳貼神異膏及服內補十宣散內托黃芪丸

愚按經云脾主肌肉脾健則肉自生然其熱熾甚宜用前藥以消其毒毒將盡宜用四物湯以養脾

詳見附錄

用藥
關鍵

內托黃芪丸

治針砭所傷惡寒發熱膿水不止肌肉不生瘡口不

斂

黃芪

八兩

當歸

洗焙
三兩

肉桂

去外
皮

木香

乳香

另
研

沉香

各一
兩

菴荳末

四
兩

右為末用薑汁荳末糊丸熟水下

愚按前症若肌肉傷而瘡口不斂用六君子湯以補

脾胃若氣虛惡寒而瘡口不斂用補中益氣湯以補
脾肺若血虛發熱而瘡口不斂用四物參朮以滋肝
脾若膿多而瘡口不斂用八珍湯或十全大補湯以
養血氣經云脾主肌肉如前藥未應但用四君歸芪
以補脾胃更不應乃屬命門火衰急用八味丸以壯
火生土若脉數發渴者難治以真氣虛而邪氣實也

論癰疽寒熱多汗用藥第四十五

李氏云近有數人病背疽或先寒後熱先熱後寒或連

日或間日必嘔痰大汗而止皆用柴胡恒山不應余謂此因脾氣不正復感寒邪痰盛而作遂先用不換金正氣散次用排膿內補散木香湯三日即愈

愚按前症若外邪既去而仍作宜用六君子湯以補脾胃大凡胃氣虛而作嘔者必喜溫熱毒內攻而作

嘔者必喜寒治當辨之

詳見附錄
用藥關鍵

家傳不換金正氣散治感冒風寒或傷生冷或瘴癘或疫癘

蒼朮

米泔浸炒四兩

厚朴

薑汁拌炒四兩

粉甘草

炙二兩

橘紅

焙三兩

藿香葉

二兩

半夏

薑製二兩

木香

濕紙裹煨

人參

白茯苓

各一兩

兩

右每服五錢薑棗水煎

論癰疽食毒物發熱第四十六

李氏論云凡癰不可食牛羊雞鵝鰕魚酒麵燂炙之物
犯之必發熱宜服梔子黃芪湯大凡臟腑已利瘡毒已
潰氣血既虛最當調護若發熱而服涼藥無不致禍

梔子黃芪湯

漏蘆 連翹 山梔子炒 防風 苦參炒 人參

犀角鎊 甘草炒 白茯苓 石葦如無桑皮代之各三錢半

右每服五錢水煎

愚按前症若飲食傷脾胃而發熱用六君神麴山查若陰血不足而發熱用四物參朮黃芪若膿血出多而發熱用十全大補湯東垣先生云胃為五臟之根本胃氣一傷諸臟皆虛七惡蜂起可不慎哉

論癰疽作渴當調補精氣第四十七

伍氏云癰疽發熱大渴毒氣熾盛急用神仙追毒丸驅下惡毒次以清臙湯萬金散五香連翹湯六味車螯散千金漏蘆湯選用之渴不止用秘傳金粉散人參黃芪散內補散之類以補津液生血氣其渴自止

愚按前症若脉沉實大便秘結宜用前藥驅逐積毒若發熱作渴飲食如故大便秘如常屬胃經實熱用竹葉石膏湯以清胃熱生津液若發熱作渴飲食少思

大便不實屬胃經虛熱用竹葉黃芪湯以補胃氣生
津液若發熱惡寒若發熱晡熱口乾作渴屬氣血不

足用八珍麥門五味以補肝脾生精血

餘見附錄
用藥關鍵

論癰疽將安發熱作渴第四十八

李氏云凡疽愈後忽發渴而不救者十有八九或先渴
而患疽者尤為難治急用加減八味丸可免前患若能
久服未不作渴亦無疽症且氣血皆壯真神劑也

愚按前症屬腎水枯涸虛火上炎口乾作渴飲水無

度或口黃作裂小便頻數或痰氣上壅煩躁不寧或
二三年先作渴飲水或口舌生瘡兩足發熱痰氣上
壅或瘡愈三四年而口乾作渴小便頻數急用前藥
多有復生者能逆知其因預服前丸可免此患若兼
手足厥冷真陽虛也宜服八味丸大凡瘡後審其腎
水不足用加減八味丸中氣虛弱用補中益氣湯氣
血虛弱用十全大補湯陽氣虛寒加薑桂如不應用
八味丸

加減八味丸

地黃

酒拌九蒸九晒八兩杵膏

乾山藥

山茱萸

去核

五味子

各炒

四兩肉桂

一兩牡丹皮

白茯苓

各三兩澤瀉

切片蒸五

次焙三兩

右各另為末入地黃膏加煉蜜丸桐子大每服七八

十九丸五更初未言語前白湯下

李氏云一貴人病疽未安而渴日飲水數升余用前方諸醫云此藥若能止渴我輩當不復業醫矣仍用木瓜烏梅等味渴愈甚用前方三日渴止久服氣血益壯飲

食加倍

愚按前方非特可治前症夫人之生以腎為主凡病
多由腎虛而致此方乃天一生水之劑最宜用之
忍冬丸治渴疾既愈預防發疽先將忍冬草入瓶內後
入無灰酒微火煨一宿取出晒乾少加甘草俱為末
又以所浸餘酒調糊丸桐子大每服六七十丸溫酒
下又能治五痔諸瘻

黃芪六一散常服終身可免癰疽實治渴補虛之劑也

綿黃芪

六兩用淡鹽水潤飯上蒸

粉草

一兩半生半炙

右為末每服二錢侵晨日午白湯調下不應作大劑水煎服古人號黃芪為羊肉可見其能補也

愚按忍冬丸解熱毒消渴之藥也六一湯補氣虛作渴之藥用之無有不驗

論癰疽口乾作渴症不同第四十九

李氏云癰疽已安之後或未安之際口舌燥黃如雞內金者乃腎水枯竭心火上炎此症最惡古人云玉華池

竭七朝亡若誤投以丹藥禍在反掌急用加減八味丸
桑枝煎五味子湯以滋補之

愚按前症若不慎房事虧損真陰而虛火上炎亦多
患此若發熱作渴或口舌生瘡或小便頻數或莖中

作痛亦宜用前藥

詳見附錄
用藥關鍵

桑枝方大治口渴取嫩桑枝細切一升炒以水三升煎
一升日服五七劑更多尤妙枹朴子云療風痺乾燥
臂痛脚氣四肢拘攣上氣眩暈久服補肺消食利小

便輕身聰明令人光澤其功不能盡述

愚按桑枝補血氣生津液輕身明目補肺腎之良劑

也

五味子湯治腎水枯涸口燥舌乾

五味子

一兩

黃芪

炒三兩

人參

二兩

麥門冬

一兩

粉草

炙五錢

右每服五錢水煎日夜服五七劑

愚按前藥乃六一散生脉散之復方滋化源之良劑

若腎水既涸虛火上炎而口燥作渴者須佐以加減

八味丸

詳見附錄
用藥關鍵

論癰疽發熱屬腎虛第五十

李氏曰一發背之熱未不自腎虛而得之者必須五更服加減八味丸

愚按前論誠為啓發後人垂惠永久蓋發背腦疽皆由腎經濕熱虛火上炎中傳惡症若非加減八味丸滋腎水以制心火補中益氣以生化源欲望其生難矣啓玄子云大寒而甚熱之不熱是無火也當助其

心大熱而甚寒之不寒是無水也當益其腎夫寒之不寒責其無水熱之不熱責其無火熱之不久責心之虛寒之不久責水之少竊謂無火者當用八味丸以益其心無水者當用六味丸以滋其腎

治驗見前四十二論

論癰疽將安當補氣血第五十一

李氏云疽疾將安每日當服十全大補湯以補氣血宜與排膿內補十宣散相間服

愚按前云潰瘍屬氣血俱虛固在所當補若患腫瘍

而氣血虛弱者尤宜預補否則雖潰而不斂矣凡大病之後氣血未復多致再發若不調補必變為他症而危或誤以為瘡毒復發反行政伐速其不起深可

為戒也

詳見附錄
用藥關鍵

論癰疽服藥捷徑第五十二

李氏云凡患瘡疽而腎脉虛者急服補藥尚恐有誤如鹿茸附子之藥是猶抱薪救火反益其勢而平補之藥亦難奏功有一貴人苦疽諸藥無效愚謂服山藥丸於

五更初物欲未接之際腎門未開之時如法服三日脉
症平復若腎經沉寒痼冷鹿茸附子之藥斯可用矣

愚按前方誠有回生之功治法見前論

加味十全湯治癰疽潰後補氣血進飲食

黃芪鹽水炒 熟地黄自製 當歸身酒洗 人參 茯苓各一錢

川芎七分 粉草五分 桂心三分 橘紅一錢 白芍藥一錢 烏藥五分

白朮炒一錢五分 五味子五分

右水煎服

愚按前方若腫瘍潰瘍氣血虛弱者用之有效更審
經絡時令尤善

人參內補散

芍藥

炒

黃芩

炒

茯苓

各一兩

粉草

炙一兩半

桂心

人參

各一兩

麥門冬

當歸

酒浸炒

熟地黄

自製

木香

各二兩

右每服五錢薑棗水煎

愚按前方若氣血虛弱固宜用之但黃芪瀉肺麥門
寒中木香行氣須有是病而後用是藥可也

神效托裡散治一切癰疽發背腸癰

黃芪

鹽水炙

忍冬葉

當歸

各五錢

粉草

二錢

右酒煎服查敷患處

愚按前方乃托裡消毒之良劑也若欲發表攻裏各有主方

排膿內補十宣散

一名十奇散
一名內補散

治瘡瘍未成速散已成

速潰膿毒自去其效如神

人參 當歸

粉甘草

炒

川芎

黃芪

鹽水各二兩

炒防

風

去

厚朴

薑桔梗

焙各一兩

香白芷

五錢

官桂

三錢

右為末每服三錢無灰酒下日夜數服愈後再服以杜後患木香湯亦可

愚按前症若陽氣虛弱風寒鬱滯而不能潰散宜用此方若熱毒壅結而不能潰散宜用托裡消毒散若氣血虛弱而不能潰散宜用參芪托裡散

調節飲食當平胃氣論第五十三

論曰素問云形不足者溫之以氣精不足者補之以味

大凡瘡疽當調脾胃益脾為倉廩之官胃為水穀之海
主養四旁須進飲食以生氣血宜用茯苓開胃散人參
內補散內補十宣散

人參順氣散治滯氣健脾胃進飲食

烏藥

一兩
五錢

白茯苓

真蘇子

微炒

人參

各一兩

青皮

粉草

炙各半兩

白朮

麩炒

白芷

各一兩

右為末每服三錢薑棗水煎服

愚按前方因脾肺腎氣盛壅遏宜用此以疏泄之若

氣虛壅滯必用益氣養榮湯以調補之今之患者多
因氣血受傷當隨症而施之

茯苓開胃散 治胃氣不開飲食不進

白茯苓

一兩

粉草

炙五錢

枳殼

麩炒黃三錢

右為末每服一錢鹽湯調下

愚按前症若胃氣鬱滯宜用前方若胃氣虛弱用四
君子湯若胃氣下陷用補中益氣湯若脾氣虛弱用
六君子湯若脾氣鬱結用歸脾湯

李氏曰胃氣弱不進飲食合服嘉禾散每五兩加人參
丁香沉香白豆蔻各二錢有一貴人苦疽用藥失序脾
虛不食余欲用嘉禾散或云內有丁沉香乃別服藥不
效仍用前散飲食頓進

愚按前症詳見附錄用藥關鍵

論癰疽成漏脉例第五十四

經云陷脉為漏留連肉腠蓋脉得寒則下陷凝滯肌肉
故曰留連肉腠是為冷漏須用陷脉散桂附丸溫補之

愚按瘡瘍為漏皆因元氣不足營氣不從逆於肉裡
或寒氣相搏稽留血脈腐潰既久陽氣虛寒外邪乘
虛下陷即成是患若治其初患當內用參芪歸木溫
補脾胃外用桑枝葱熨接陽氣使自消散若久而不
能成膿亦用前二法補助以速之若膿既成而不潰
用艾於當頭灸數炷以出之却服十全大補湯患者
又當慎起居節飲食庶幾收斂若用冷針開刺久而
內出青膿外色黑黯或誤用生肌散速其收斂反助

其邪必成敗症

陷脉散 治漏瘡治遠年癭瘤驚惕卧寢不安肢體掣

痛

乾薑

炮

琥珀

另研

附子

炮去皮臍

大黃

煨各一兩

丹參

三兩

石硫

黃

另研

白石英

另研

鍾乳粉

另研

烏賊魚骨

研各半兩

右為末用猪脂和傅死肉不消者加朴硝

三兩

神效桂附丸治陽氣虛冷漏諸瘡

桂心

附子

炮

米醋浸碎

三次去臍

火乾

三

厚朴

薑製

粉草

炙

白朮

炒各
一兩 木香 錢一
乳香 另研
二錢

右為末煉蜜丸桐子大每服二三十丸空心米湯下

神效瓜蒌散 治乳癰瘰癧與立效散間服

黃瓜蒌

子多者
一箇杵

當歸尾

五錢

沒藥

一錢
另研

甘草節

半兩

右用酒三碗煎一碗分三次服未成即消已成即潰

愚按前方乃總治瘡瘍之良劑若治乳癰當審其因

蓋乳房屬陽明胃經乳頭屬厥陰肝經若怒動肝火

陽明血熱宜踈肝清熱焮痛寒熱宜發表散邪腫焮

痛甚宜清肝消毒并隔蒜灸不作膿或膿不潰托裡
為主不收斂或膿清稀補脾胃為主膿出反痛或發
熱作痛補氣血為主腫焮作痛或晡熱內熱補血為
主飲食少思或作嘔吐補胃為主飲食難化或作泄
瀉補脾為主勞碌腫痛補氣血為主怒氣腫痛養肝
血為主若為兒口所吹而發腫焮痛須吮通探散否
則成癰矣亦治以前法若婦人經一二載潰者名曰

乳岩不治

詳見校註婦人良方外科樞要

立效散 治癰疽瘰癧

皂角刺

半斤細剉炒赤

粉草

二兩

乳香

另研

沒藥

另研

瓜蒌

各一兩

五箇連皮細研

右為末每服一兩好酒煎服

愚按前方治癰疽瘰癧解毒止痛通用之良劑也若瘰癧寒熱焮痛腫赤乃肝經氣病當清肝火以養肝血若寒熱既止而核不消乃肝經之血亦病也當養肝血以清肝火若初如荳粒着於筋肉色不變內熱

口乾精神倦怠久不消潰乃肝脾虧損當健脾土培
肝木外臺秘要云肝腎虛熱則生癰矣病機云癰癧
不係膏梁丹毒因虛勞氣鬱所致補形氣調經脉其
瘡自消若誤下之必先犯病禁經禁矣

詳見校正婦人良方外科

樞要

生肌散 治瘡口氣滯鬱熱肌肉不生而不收斂者

木香 檳榔 黃連

各等分

右為末敷患處

愚按前症若餘毒滯於瘡口而不生肌收斂者宜用
烏金膏以腐化之若寒邪蘊於瘡口而不生肌收斂
者宜用豆鼓餅以溫散之若因氣虛血弱不能運於
瘡口而不生肌收斂者宜用補中益氣湯以培養之
獨聖散凡瘡瘍皆因氣滯血凝宜服香薷蓋香能行氣
通血也如瘡初作便以此藥入茶飲之

香附子

薑汁淹一宿
焙乾研碎

右無時以白湯調服二錢潰後以局方小烏沉湯加

甘草少許仍服尤妙

愚按前方氣味辛散宜施於形體充實氣鬱血凝者
若血虛氣弱陰虛發熱者又當隨症制宜不可以例
施也

梅花飲子初服防毒內攻

忍冬藤四兩 括萎根 甘葛根 川芎 烏梅 綿

黃芪炒 甘草 蘇木 各一兩

右作四劑水酒煎服

愚按前方乃解消熱毒之劑若邪氣盛而真氣虛者
又當補托其內

替針丸 治膿成不潰出者

白丁香

硃砂

另研

真沒藥

另研

乳香

糯米

關

先用礮

灰拳大關

磁

碗內量入井水待熱氣將息以

灰中良久候米如水晶狀取出用關

如米未就

再用灰製

右另為末各一匙入糯米和勻收貯用時飯丸麥粒
大每用一粒水濕粘瘡頭其膿自出

愚按瘡瘍之症若氣血壯實膿成不潰者宜用此方以洩其毒則肌肉易生瘡口易斂若氣血虧損須用甘溫之劑以培根本否則不惟膿不潰出且難收斂若附骨疽及緊要之地當及時針砭為善

綠雲散治五毒發瘡於背腦或手足

鳳尾草

形如鳳尾葉背有金星灸乾一兩

粉甘草

一錢

右用酒一碗煎三五沸入冷酒一碗飲之以醉為度

立效

愚按前方治金石發疽果有神效設當疏通發散宜分表裡若飲排膿生肌必須補托

宣毒散消瘡毒收赤暈

小米

合一

赤小豆

南星

草烏

各一

露蜂房

三兩炒焦

白礬

半兩

右為末用淡醋調敷四畔乾則頻用醋潤之

愚按前方解毒行經濟毒散血治外之法也

托裡散未成則易消已成則易潰既潰則生肌

黃瓜萋一箇忍冬草

乳香

各一兩

蘇木

半兩

沒藥

三錢

甘

草

二錢

右每服用酒三碗煎二碗空心日午臨睡分三服查
為細末酒糊丸彈子大硃砂為衣細嚼當歸酒下治
打撲傷損尤妙

愚按前方若無汗下二症宜調和榮衛者殊有良驗
若血氣虛弱不能腐潰生肌者還當補托其內

清涼膏治一切瘡瘍膿去後用之

當歸_二 白芷_兩 白芨 白芫 木鱉子_{去殼} 黃栢 白藪_{去皮}

乳香

白膠

_{各半}

黃丹

_{淨五}

麻油

_{十二}

右入油煎黑去渣入黃丹以槐柳枝不住順攪再煎

成膏下乳香等藥

碧油膏止痛排膿灸後用此

桃枝

柳枝

桑枝

槐枝

乳香

_{另研}

血竭

_{各五錢研}

黃丹

_{淨四兩}

右用麻油十兩煎焦去渣入丹再煎成膏入乳香血

竭

愚按前二方藥味平易可用之

神效酒煎散治一切瘡瘍其效如神

人參

沒藥

另研

當歸尾

各一兩

甘草

括萎

一箇半生半炒

右以酒三碗煎二碗作四服查焙乾加當歸末一兩

酒糊丸桐子大每服五十丸用浸藥酒下善消毒活

血

愚按前症若膿既去而不生肌者當審其因而補之

治癰疽未成用吳茱萸炒為末雞子清調搽神效

愚按前症若氣滯壅腫用此方疏通隧道以散之若氣虛壅腫當托裏補接以消之

洪丞相方用螞蟥針法第五十五

治癰疽初作先以筆管一箇入螞蟥一條以管口對瘡頭使螞吮瘡膿血其毒即散如瘡大須換三四條若吮正穴螞必死矣累試累效若血不止以藕節上泥塗之若瘡頭未明以井邊泥塗上先乾處即是

愚按癰疽既成毒血凝聚于外可用此法吮去固善
但能治其末耳又當審其邪在表裡併元氣虛實而
藥之斯内外合一而為萬全也

癰疽經驗雜方

經驗方治金石發癰

黑鉛一斤甘草三兩

右用酒一斗置磁器內先以甘草置在一邊另將鉛
熔投酒一邊取鉛再熔仍投九度取酒飲醉寢即愈

愚按前方治金石發疽之良法也。氣血虧損者仍當補托可也。

肘後方治發背欲死，取冬瓜切去一頭，合瘡上瓜爛，仍切復合之。瓜未盡用而瘡已安，仍用膏藥貼之。

愚按此方若焮腫痛甚，其邪在表者最宜用此法。宣熱拔毒，以通其滯。若腫痛發渴，大便秘結，其邪在裡者，須佐以內疏黃連湯，通利臟腑，以泄其毒。在經絡者，當佐以托裡榮衛湯，以調氣血，斯善。

張文仲治耳下石癰不作膿用商陸根杵爛頻搽之

愚按商陸破氣軟堅果係石癰宜用此方治之若怒動肝火而腫硬或發寒發熱宜用柴胡清肝散加釣藤山梔以養血氣清肝火肉色不變晡熱內熱宜用逍遙散加龍膽草以養肝血清肝火若肝火血燥筋攣或如貫珠宜用柴芍參苓散加釣藤以養血氣佐以六味丸以生腎水若時消時作此脾肺之氣滯而疾結也須用歸脾六君二湯以和之若前藥不應當

佐以海藻丸以散堅經云形傷則痛氣傷則腫不可

輕用行氣破血之劑

已上治症見外科樞要

治癰疽疔用生鹿角共於砂石器內同米醋磨膿塗患處四圍塗一二日內消

愚按前方內消之法如未應須審其邪在表裡人之虛實而治之不可治外而忘內也

治癰疽用生甘草為末酒調二錢服連進數服自消

愚按前方乃清熱消毒之劑若因膏梁積熱金石蓄

毒血氣壅滯者最宜用如脾胃虛弱血氣痞滯者不
宜槩用恐反寒胃氣故也

升麻湯治肺癰胸乳間作痛嘔吐膿血腥穢

川升麻 苦梗 薏苡仁 地榆 黃芩 赤芍

藥 牡丹皮 甘草

各等分

右為散每服一兩水煎服

愚按前方乃消毒清熱排膿之良劑如未應用桔梗
湯咳嗽短氣小便短少者佐以參芪補肺湯體倦食

少或咳嗽短氣者佐以參朮補胃湯咳嗽痰湧者腎
虛水泛也佐以六味丸口乾咽燥虛火上炎者佐以
加減八味丸若發熱喘唾膿血飲食不入為敗症皆
為脾土虧損不能生肺金肺金不能生腎水能補脾
肺滋腎水多有得生者若面赤脉大者難治面黃白
脉浮濇者易治若嘔膿不止不治嘔膿自止自愈

治驗

見婦人良方
外科樞要

治穀道前後生癰謂之懸癰用粉草一兩截斷以潤水

浸潤炙令透內細剉用無灰酒煎服有人患此已破服
兩劑瘡即合

愚按前症患於陰莖之後穀道之前屬足三陰虧損
之症輕則為漏瀝盡氣血而亡重則內潰而即殞常
治初起濕熱壅滯未成膿作痛或小便澀滯者用龍
膽瀉肝湯腫痛焮盛仙方活命飲並以製甘草佐之
若不能成膿或不潰者用八珍散主之若膿已成者
急針之欲其生肌收斂腎虛者六味地黄丸血虛者

四物皆參朮氣虛者四君加芎歸脾虛者補中益氣
湯氣血俱虛者八珍湯大補湯若用寒涼消毒則誤

矣

治驗見外科
樞要

拾遺附

癰疽之疾男子與婦人無異惟婦人有月閉血虛氣結
三症之異耳餘當依常法治之

愚按男子之症多屬肝腎女子之症多屬肝脾治者
亦當辨之

凡小兒屬純陽其癰疽之疾也多因心氣熱而患之

愚按前症亦有因稟賦而致者嘗治少叅史南湖孫
陰囊赤腫余作胎毒治之而瘡後患發熱痰嗽見症
不一難以明狀遂胗其母有鬱火血熱之症乃用解

毒消肝等藥子母俱服而愈

詳見保嬰撮要

崔氏方治手足甲疽或因脩甲傷肉或因損足成瘡潰
爛上脚用綠礬置鉄板上煨沸色赤如溶金色者為真
沸定取出研末以鹽湯洗搽之

愚按前症即脫疽也此方固有良驗尤當調元氣為善大抵此症先因醇酒炙博膏粱厚味傷脾或房勞虧損腎水故有先渴而後患有先患而後渴者若色赤作痛自潰可治色黑不潰不治色赤作痛者先用隔蒜灸活命飲托裡散再用十全湯大補湯加減八味丸色黯不痛者隔蒜灸桑枝灸亦用十全大補湯加減八味丸則毒氣不致上侵元氣不致虧損庶可保生亦有因脩手足口咬等傷者若元氣怯弱或犯

房事外塗寒涼內服尅伐損傷脾胃患處不潰色黯
上延亦多致死重者須解去當以脚力轉解周髀輕
拽之使筋隨骨出而毒得泄否則毒筋內斷仍上潰
雖去無益且偏僻之處氣血罕到藥難導遠况攻毒
之劑先傷脾胃反損元氣不若灸法為良重者須解
去為善故孫真人云在肉則割在指則截雖親之遺
體不忍毀傷然不如是則勢必至於天歿亦非體親
之心也况患處已經散解不痛又何憚而不為乎女

子亦有此患多因鬱怒虧損肝脾所致治法當與前

同患者知之

治驗見外科樞要

經驗方治碰傷磕損跌撲腫痛或出血用葱白切細杵爛炒焦敷患處蒜冷再易神效

愚按醫學綱目稱前方有神效余嘗以治前症青腫不散死肉不潰佐以健脾胃之藥其功尤捷此內外所以合一也

百一方治有刺在肉以蟻螯研敷立出

衍義方治有木刺入肉嚼牛膝根舂之即出

肘後方治箭鏃入骨以巴荳肉微炒以蜣螂研勻塗傷處俟痒極拔出

孫真人治箭鏃針刺在咽喉胸膈杵蟻蛄塗患處自出
愚按前四方用之果有良驗

肘後方治熱油及火燒用丹參八兩調以羊脂二斤煎三五沸取傅之

至聖膏治湯火瘡用雞子黃置銀石器內熬油調胡粉

傳之

愚按前症若發熱作渴小便赤澀用四物山梔連翹
甘草養陰血以消毒若患處肉未死而作痛用四君
芎歸山梔連翹甘草健脾胃以消毒若患處肉已死
而不潰用八珍白芷甘草補氣血以排膿如未應加
肉桂若患處死肉已潰而不收斂用四君芎歸黃芪
健脾胃以生肌如未應加炮薑若小兒患之或目劓
頭搖等症用四君加芎歸山梔健脾胃以清肝木若

食後即有此患或腹脹作痛用四君山梔山查神麩
壯脾氣以消導大凡初患此症用神效當歸膏敷之
輕者自愈重者自腐良肉易生其色赤者乃火毒未
盡必搽至色白為度倘患于肢節伸屈之處若敷此
且免生痂傷碍新肉復潰難痊倘回祿煙薰致死者
以蘿蔔搗汁灌之即甦以其辛能散氣也

治驗見
正體部

附治驗

錦衣楊求興厨下夜間回祿凡睡此房已死將死者

灌以蘿蔔汁良久悉愈凡罹此患者以此治之其應
如響

騎竹馬灸法圖

內托散

五香連翹湯

沉麝湯

五香湯

漏蘆湯

自
卷七十一
柞木飲

阿膠飲

牛膠飲

黃礬飲

國老膏

萬金散

遠志酒

忍冬酒

忍冬草圖

已上方見前卷

追毒丸

轉毒散

單煮大黃湯

神仙截法

秘傳連翹湯

千金漏蘆湯

六味車螯散

止痛靈寶散

神效麻仁丸

清心內固散

清臙竹葉湯

猪蹄湯

神硝散

聖效散

神仙陷脉散

漏蘆湯

已上方見中卷

附錄

瘡瘍彙括關鍵處治之法

一瘡瘍用藥當審其經絡受症標本虛實以治之不可
泥于熱毒內攻專用寒涼剋伐之劑虧損脾胃氣血多
致有誤若腫高焮痛者邪氣實也先用仙方活命飲後

用托裡消毒散漫腫微痛者真氣虛也用托裡散如不應加薑桂若不作膿不腐潰陽氣虛也用四君子加黃芪肉桂若膿既出而反痛氣血虛也用八珍散不生肌不收斂脾氣虛也四君子加芍藥木香又當舍時從症如腫痛煩躁發熱飲冷便秘脉洪數實是為五實雖在嚴寒必用大苦寒之劑瀉其陽以救其陰若脉細皮寒瀉利腸鳴不食嘔吐手足逆冷是為五虛雖在盛暑必用大辛熱之劑散其陰以回其陽若執其常法則誤矣

一瘡瘍作嘔如熱盛焮痛邪氣實也用仙方活命飲解之若因作膿焮痛胃氣虛也用托裡消毒散主之膿熟脹痛氣血虛也用托裡散或針以泄之焮痛便秘熱蘊於內也用內疏黃連湯導之寒藥傷胃者托裡建中湯食少胃寒者托裡益中湯中虛寒淫者托裡溫中湯肝木乘脾土者托裡益青湯胃脘停痰者托裡清中湯脾虛自病者托裡益黃散鬱結傷脾者托裡越鞠湯

一瘡瘍用圍藥如腫痛熱渴症屬純陽宜內服濟陰丹

外敷抑揚散若似腫非腫似痛非痛似潰不潰屬半陰半陽宜內服沖和湯外敷陰陽散若微腫微痛或色黯不痛或堅硬不潰症屬純陽宜內服回陽湯外敷抑陰散

一瘡瘍作痛若大便秘結者用內疏黃連湯熱毒熾盛者仙方活命飲瘀血凝滯者乳香定痛散作膿而痛者托裡消毒散膿脹而痛者針之膿潰而痛者補之氣虛而痛者四君歸芪血虛而痛者四物參芪腎虛而痛者

六味地黃丸口乾作渴或小便頻數加減八味丸

一瘡瘍陽氣脫陷或誤服尅伐或膿血大泄或吐瀉勞
役或誤行房事若發熱煩熱頭痛頭暈便血目赤煩喘
自汗盜汗氣短唾痰體倦熱渴意欲飲水投水身熱惡
寒憎寒惡衣揚手擲足汗出如水腰背反張呻吟音不
絕脉浮洪大此無根虛火假熱之症若畏寒頭痛咳逆
嘔吐耳聾目矇小便自遺或時淋瀝瀉利腸鳴裡急腹
痛玉莖短縮冷汗時出齒牙浮痛肢體麻痺或厥冷身

痛咬舌嚙唇舌本強硬吃逆喘促脉微沉細此危殆之症但見一二急用大劑參附湯補之多得復生

一瘡瘍潰後發熱煩躁若發熱無寐血虛也聖愈湯自汗不止氣虛也四君子加黃芪五味子發熱煩躁肉瞤筋惕氣血虛也八珍湯大渴面赤脉洪大而浮陰虛發熱也當歸補血湯肢體微熱煩躁面赤脉沉微陰盛發躁也四君薑附

一瘡瘍大便秘結若作渴飲冷其脉洪數而有力者屬

實火宜用內疎黃連湯若口乾飲湯其脉浮大而無力者屬氣虛宜用加味八珍湯若飲食雖多肚腹不脹此內火消鑠切不可通若腹痞脹而不通者乃因直腸乾涸以猪膽汁導之若誤行疏導復傷元氣則不能潰斂一瘡瘍大便泄瀉若因寒涼傷脾六君加砂仁脾氣虛弱六君煎送二神丸脾虛下陷補中益氣送二神丸命門火衰用八味丸料煎送四神丸腎虛不固薑附湯加吳茱五味脾腎虛寒參附湯送四神丸脉沉而細飲食

不下用薑附湯多有復生者

一瘡瘍小便頻數或莖中澀痛者乃腎經陽氣虧損陰無以化之惡症也用加減八味丸以補陰足脛逆冷者用八味丸以補陽小便頻而黃者四物加參朮麥門五味以滋肺腎小便短而黃者補中益氣加山藥麥門五味以補腎若熱結膀胱而不利者五淋散以清熱脾肺氣燥而不化者黃芩清肺飲以滋陰若膀胱陰虛陽無以生者宜滋腎丸膀胱陽虛陰無以化者宜腎氣丸若

老人陰痿精內敗者用加減八味丸加車前牛膝如不應加附子若大小便牽痛愈痛則愈便愈便則愈牽痛以前藥加附子多有生者苟用黃柏知母淡滲之劑既瀉真陽復損真陰速其危矣

一瘡瘍作渴焮痛發熱便利調和者上焦熱也用竹葉石膏湯腫痛發熱大便秘澀者內臟熱也用四順清涼飲焮腫痛盛者熱毒蘊結也用仙方活命漫腫微痛者氣血虛壅也用補中益氣湯若因胃火消燥而津液短

少者用竹葉黃芪湯若因胃氣虛而不能生津液者用
補中益氣湯若因內氣傷而內亡津液者用七味白朮
散若因腎水乾涸作渴或口舌乾燥者用加減八味丸
或先口乾作渴小便頻數而後患疽或疽愈後作渴飲
水或舌黃乾硬小便數而疽生者尤其惡也苟能逆知
其因預服加減八味丸補中益氣湯以滋化源可免是
患

一瘡瘍出血因五臟之氣虧損虛火動而錯經妄行也


若因肝熱而血妄行者四物加炒梔丹皮苓朮肝虛不能藏血者六味地黃丸心虛不能主血者四物加炒連丹皮苓朮若脾虛熱不能統血者四君加炒梔丹皮若脾經鬱結者用歸脾湯加五味子若脾肺氣虛者用補中益氣加五味子若氣血俱虛者用十全大補若陰火動者用六味丸加五味子

一瘡瘍用針當辨生熟淺深若小按即痛者膿淺也大按方痛者膿深也按之而不復起者膿未成也按之而

即起者膿已成也若膿生而即針則徒泄其氣血而膿反難成若膿熟而不針則腐潰益深瘡口難斂若瘡深而針淺則內膿不出外血反泄若瘡淺而針深則內膿雖出良肉反傷其元氣虛弱必先補而後針不論尻神若膿出而反痛或煩躁嘔逆皆由血氣虧損宜急補之不論尻神者蓋因患處已潰故也

一瘡瘍肌肉不生若赤色而不生者血熱也四物湯加牡丹皮晡熱內熱血虛也四君子加歸地丹皮若膿水

清稀氣血俱虛也十全大補湯食少體倦脾氣虛也補
中益氣湯煩熱作渴起居如常胃火也竹葉黃芪湯煩
熱作渴日晡熱甚腎虛也用加減八味丸



薛氏醫案卷七十六